

Tahan Asaari bukan motif politik: PM

Oleh Othman Mamat dan Ahmad Zaini Kamaruzzaman

JITRA, Jumaat - Datuk Seri Dr Mahathir Mohamad hari ini menjelaskan penahanan ketua al-Arqam, Asaari Mohamad, bukan bermotifkan politik tetapi semata-mata kerana kerajaan menunaikan tanggungjawab untuk menjaga kesucian Islam.

Menurut Perdana Menteri, kerajaan terpaksa bertindak demikian kerana ajaran al-Arqam sudah jauh menyeleweng sehingga Asaari disifatkan sebagai seorang yang mempunyai sifat ketuhanan.

Selain itu, katanya, Asaari mendakwa dirinya menemui Nabi Muhammad saw dalam kerajaan sadar dan kononnya Rasulullah memanggil pemimpin al-Arqam itu sebagai tuan.

"Orang ini sudah membawa ajaran yang menipu sehingga orang lain semua ikut dan kerajaan berasa bertanggungjawab memelihara agama Islam supaya kepercayaan karut ini tidak berkembang.

"Kita tahu kalau ia

mula berkembang, susah untuk ditarik balik. Kita khuatir... Dalam soal agama ini kalau kita sudah percaya, susah nak dididik," katanya ketika merasmikan Persidangan Perwakilan Khas Umno Bahagian Kubang Pasu, di sini hari ini.

Perdana Menteri berkata, kerajaan tidak boleh menunggu sehingga pilihan raya selesai untuk mengambil tindakan terhadap Asaari walaupun langkah itu mungkin menjadi isu pilihan raya.

"Ini membuktikan tindakan itu bukan bermotif politik sebaliknya semata-mata untuk memelihara kesucian Islam.

"Sebenarnya kalau mengikut kepentingan politik, kita tidak harus mencari lebih banyak musuh kerana kita sudah mempunyai cukup musuh politik. Lagi pun, kita bukan ada kelahi apa-apa dengan Arqam.

"Lebih baik kalau kita senyap, tidak menimbulkan masalah dan apabila ada pilihan raya, ia (Arqam) tidak kacau. Sekarang, kita dengar ia

hendak kacau...hendak sokong DAP," katanya.

Menurut Dr Mahathir, soal akidah perlu ditangani dengan berhati-hati kerana apabila seseorang mula mempercayai sesuatu ajaran walaupun karut, mereka sukar dididik semula.

Mengenai Asaari, Perdana Menteri berkata, pemimpin al-Arqam itu mendakwa dirinya mempunyai sifat Tuhan, termasuk menjadikan sesuatu dengan hanya menyebut 'kun fayakun' selain boleh melakukan perbuatan yang setanding dengan kekuasaan Allah.

Menurutnya, Asaari juga mengaku berasal daripada keluarga Nabi Muhammad saw dengan menambah perkataan At-Tamimi pada hujung namanya bagi menunjukkan dia adalah daripada suku kaum Quraish.

"Dulu dia bukan orang Quraisy tetapi sekarang ini tiba-tiba dia menjadi keturunan nabi. Orang Quraisy apa duduk di Klang... abang dia, keluarga dia ada di Negeri